



9. Tschanteda dal cussagl cumünel in marcaldi, ils 14.5.2014 a las 19.00 in chesa cumünela S-chanf

Presidi: Duri Campell

Preschaints: Jnes Barblan, Liun Quadri

Absaints: Gian Andrea Bott, Paolo Bernasconi

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 0.113 Büro electorel per las votumaziuns/tschernas dals 18.05.2014
4. 0.212 Tscherna rasgeder
5. 0.212 Tscherna collavuratura per l'infurmaziun turistica
6. 6.500 Engadin Bus, dumanda per müdamaints dals noms fermativas da bus a S-chanf „Posta“ e correger „Sumvih“ in Somvih
7. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 16.04.2014 vain approvo unanimamaing.

**56 0.211 Dumanda da fabrica
Leimer Tatiana e Kurt, müdamaints vi dal proget approvo**

Zieva cha l'uffizi da fabrica ho invio üna controlla da fabrica intermediara, ho l'architect inoltro ils plans d'execuziun. La situaziun fabrichedada actualmaing correspuonda als plans inoltros zievatiers pel fabricat sün parcella nr. 157/763. Il cussagl decida unanimamaing da conceder il permiss da fabrica zievatiers pels müdamaints.

**57 0.211 Dumanda da fabrica
Jacob Vic e Helen, müdamaints vi dal proget approvo**

L'uffizi da fabrica ho mno tres üna controlla da collaudaziun ed ho constatato, cha las lavuors sün parcella nr. 142 in Chauntaluf nu sun gnidas effectuadas scu aderidas a sieu temp. Impü nun haun ils patruns da fabrica fabriccho our la crapenda in surfatscha d'abiter. Immediatamaing haun ils patruns da fabrica inoltro ils plans definitivs chi correspuondan a la situaziun actuela. Siand cha la crapenda nu vain nüzageda scu surfatscha d'abiter, haun ils patruns da fabrica d'indemniser pü pochs parkegis. Il cussagl decida da conceder il permiss da fabrica zievatiers e d'adatter l'indemnisaziun pels parkegis al stedi actual regard la surfatscha d'abiter.

**58 0.211 Dumanda da fabrica
Parli Linard, drenascha intuorn la chesa i'l üert, müdamaints
interns**

Il cussagl piglia cugnuschentscha da l'intenziun da Linard Parli da fer intuorn la chesa sün parcella nr. 99 i'l üert üna drenascha per l'ova da meteor. Impü voul il patrun da fabrica rimplazzer illa stalla il fuonz da lain cun üna platta da betun. Il cussagl decida unanimamaing da conceder il permiss da fabrica cun differentas cundiziuns.

**59 0.211 Dumanda da fabrica
Salzgeber Simon, müdamaints proget lingia dal s-chudamaint a
distanza attachs Thöny e Vogelsang**

Il proget per la lingia dal s-chudamaint a distanza sün las parcelas nr. 114 e nr. 120 ho da gnir realiso oter scu previs. Il cussagl decida unanimamaing d'aderir a la dumanda pels müdamaints. Resguardand la decisiun da la radunanza cumünela dals 02.04.2014 vegnan ils contracts correspondents stipulos pü tard, tenor las direcziuns definitivas da las lingias.

**60 0.211 Dumanda da fabrica
Zevi Aroldo, nouva fnestra vers mezzanot**

Il cussagl piglia cugnuschentscha da la dumanda dad Aroldo Zevi per eriger üna nouva fnestra vers mezzanot sül plaun terrain da la chesa sün parcella nr. 134 in Bügl Suot. Cun que cha la chesa as rechatta illa zona da vegl innò abiteda, es gnida inoltreda la dumanda eir a la chüra da monumaints. Il cussagl decida unanimamaing da conceder il permiss per la fnestra prevista cun differentas cundiziuns.

**61 0.211 Dumanda da fabrica
Pavanello Nadia e Sandro, nouvs uschöls**

Nadia e Sandro Pavanello haun inoltro üna dumanda per munter tar la chesa sün parcella nr. 775 in Davous Chesas, uschöls in lain natürel. Il cussagl decida unanimamaing da conceder il permiss da fabrica giavüscho cun differentas cundiziuns.

**62 0.211 Dumanda da fabrica
Weber Kurt, renovaziun fatschedas e müdamaints interns**

Il cussagl piglia cugnuschentscha da la dumanda da Kurt Weber per refer la fatscheda sün parcella nr. 69 in Chauntaluf scu eir per fer müdamaints interns. Il cussagl decida unanimamaing da conceder il permiss da fabrica cun la cundiziun, cha aunz cu pittürer la fatscheda, ho il patrun da fabrica d'invider a l'uffizi da fabrica per ün'expertisa da muosters da culur.

**63 0.211 Dumanda da fabrica
Barrow Janet e Paul nouva fnestra vers mezdi e müdamaints
interns**

Janet e Paul Barrow haun inoltro üna dumanda per eriger üna nouva fnestra vers mezdi scu eir per fer müdamaints interns vi da l'abitaziun illa chesa sün parcella nr. 100 in Bügl Suot. L'intent da fabrica intern nu pericliteschan l'uorden federel per seguondas abitaziuns. Il cussagl decida unanimamaing da conceder il permiss da fabrica cun differentas cundiziuns.

**64 0.113 Elecziuns
Büro electorel per las votumaziuns /tschernas dals 18.05.2014**

Al büro electorel per las tschernas chantunelas e circuitelas scu eir per las votumaziuns federelas dals 18 meg 2014 faun part: Jnes Barblan, Liun Quadri, Carla Robbi, Patrice Mayer, Francesco Pietrogiovanna e l'actuar Duri Schwenninger.

**65 0.212 Persunel
Tscherna rasgeder**

Il rasgeder Christian Platzer vaiva desdit la piazza süls 31.05.2014. In seguit s'ho publicho la piazza libra e sün la publicaziun sun entredas 4 annunzchas. Zieva üna prüma valütaziun da las annunzchas restan auncha 2 candidats chi vegnan in dumanda. Il cussagl decida unanimamaing, sün proposta dal silvicultur, da tscherner a Marc Heussner da S-chanf scu nouv rasgeder. Il nouv tschernieu cumainza sieu impieghi ils 01.06.2014.

**66 0.212 Persunel
Tscherna collavuratura per l'infurmaziun turistica**

La collavuratura da l'infurmaziun turistica, Carla Robbi vo in settember 2014 in pensiun. Resguardand l'uorden da persunel chantunel, artichel 2 alinea a, s'ho decis da desister da publicar la piazza libra, siand chi'd es avauntmaun üna persuna interna chi'd es competenta e pronta da surpiglier la piazza. Il cussagl decida unanimamaing da tscherner a Denise Hinden scu nouva collavuratura da l'infurmaziun turistica. Ella cumainza l'impieghi ils 01.07.2014 e vain lavureda aint il prüm in ün lö pü grand, tal büro d'infurmaziun turistica a Puntraschigna. Zieva ün mais tuorn'la darcho a S-chanf per gnir lavureda aint in noss büro d'infurmaziun turistic.

**67 6.500 Trafic public
Engadin Bus, dumanda per müdamaints dals noms fermativas da bus a S-chanf „Posta“ e correger „Sumvih“ in Somvih**

Ils respunsabels dal Bus engiadinais haun inoltro üna dumanda per müder per part ils noms da las fermativas dal bus a S-chanf. La fermativa Somvih es gnida numneda quella vouta, cur cha'l bus Engiadinais vaiva cumanzo il servezzan, sbaglio cun Sumvih. Impü es gnieu la dumanda, siand chi nu do pü üna posta a S-chanf, da müder il nom da la fermativa sün „Center“ u „Chesa cumünela“. Zieva cuorta discussiun decid'il cussagl unanimamaing d'accepter la correctura da Sumvih in Somvih e'l müdamaint dal nom da la fermativa posta sün Chesa cumünela.

68 9.999 Varia

Il president infurmescha, cha'l güdisch administrativ ho refüso il plaunt regard ils cuosts da la procedura in connex cun l'implanter böschs. La vschinaucha ho survgnieu radschun in tuot ils puncts.

A las 20.05 vain la tschanteda alveda.

In buna fè

L'actuar:
D. Schwenninger